



---

■ PER LA DUMENGIA

---

# Il contact manca

DA ANTHONY DE MELLO,  
TRANSLATÀ EN RG

---

Ina famiglia, bab, mumma e trais uffants era ventiraivla da pudair passentar quindesch dis da vacanzas sper la mar. Ils uffants fagevan bogn e construivan castels da sablun, ils geniturs ruassavan e legiaivan.

Mintga di vegniva ina pitschna dunna veglia da la riva si. Ils chavels da quella eran grischs e sgulatschavan en il vent e ses vestgì era tschuf e sdratschà. La dunnetta murmugnava insatge vers a sezza durant ch'ella auzava dal sablun objects mettand quels en in satg da plastic.

Il terz di che la dunna è vegnida da

la riva si han ils geniturs clamà ils uffants tar els. Els na duajan betg ir memia datier da la dunna tschuffa. Cura che lezza è passada sperasvi, sco ils dis avant, sa sbassand cuntinuadamein per auzar si insatge, ha ella salidà la famiglia cun in surrir. Ma ses salid nun è vegnì respundi.

Intginas jamnas pli tard, puspè a chasa en la patria, è la famiglia vegnida a savair, tras conoschents che eran stads en la medema regiun en vacanzas, da la dunnetta. La dunna veglia tschuffa ed en sdratscha auzava si dal sablun stagglias da vaider. Ella aveva elegì ina incumbensa da la vita, ella impediva ch'ìls uffants sa taglian ils pes a la riva da la mar.